

Bil. 2

Rabu

15 September 2021



MALAYSIA

PENYATA RASMI PARLIMEN
Parliamentary Debates

KAMAR KHAS
Special Chamber

**PARLIMEN KEEMPAT BELAS
PENGAL KEEMPAT
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Halatuju Program MM2H Selepas Pandemik COVID-19**
- *YB. Tuan Wong Hon Wai (Bukit Bendera)* (Halaman 1)
- **Pusat Latihan Berasrama Bagi Archagar Tempatan**
- *YB. Tuan Sivakumar Varatharaju Naidu (Batu Gajah)* (Halaman 5)

**MALAYSIA
KAMAR KHAS
PARLIMEN KEEMPAT BELAS
PENGKAL KEEMPAT
MESYUARAT PERTAMA
Rabu, 15 September 2021
Mesyuarat dimulakan pada pukul 2.30 petang
DOA**

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Halatuju Program MM2H Selepas Pandemik COVID-19

2.34 ptg.

Tuan Wong Hon Wai [Bukit Bendera]: Terima kasih Tuan Yang di-Pertua. Pada kesempatan petang ini, izinkan saya membangkitkan isu yang berkaitan dengan hala tuju Program Malaysia My Second Home (MM2H).

Malaysia telah disenaraikan di laman web 'International Living' tahun 2018 sebagai tempat pertama terbaik untuk bersara di negara Asia dan tempat kelima di seluruh dunia. Salah satu sebab ialah kerana Program 'Malaysia My Second Home' (MM2H) yang telah berjaya menarik ramai peserta dari seluruh dunia sama ada dari Asia, Eropah atau Amerika Syarikat.

Program ini dilancarkan pada tahun 2002. Terdapat rangkaian ekonomi yang berkaitan dengan MM2H iaitu sektor hartanah, perbankan, peruncitan, pelancongan, pendidikan dan perubatan yang mendapat manfaat daripada kesan ekonomi berikutan pelaburan dan perbelanjaan peserta MM2H. Program MM2H telah dibekukan sejak bulan Mac 2020 dan baru-baru ini telah diumumkan hasil kajian semak semula tersebut dengan syarat-syarat tambahan yang ketat dan tidak menarik.

Kritikan terhadap semakan semula syarat-syarat MM2H seperti berikut:

- (i) pendapatan bulanan ditingkatkan dari RM10,000 ke RM40,000 adalah terlalu tinggi, iaitu empat kali ganda. Ambang pendapatan terlalu tinggi dan menyebabkan peserta- peserta

memilih ke destinasi lain yang mempunyai ambang pendapatan yang lebih rendah; dan

- (ii) masa mastautin di Malaysia mesti melebihi kumulatif 90 hari setahun. Program MM2H hanya menawarkan '*social visit pass*' dan bukan taraf pemastautin tetap (PR).

Oleh itu ia perlu diberikan fleksibiliti dalam masa mastautin. Satu alternatif yang boleh dipertimbangkan ialah jumlah hari mastautin dalam tempoh 10 tahun dijadikan sebagai asas pertimbangan untuk melanjutkan kelulusan berikutnya dan bukan 90 hari setahun sebagai syarat.

Lain-lain syarat seperti jumlah aset simpanan tetap hendaklah dikurangkan khususnya dalam era kegawatan ekonomi selepas pandemik COVID-19. Sektor ekonomi Malaysia telah merosot akibat pandemik COVID-19. Oleh itu, hala tuju dasar ekonomi dan pelaburan hendaklah fleksibel dan menarik pelaburan serta penyertaan MM2H.

Syarat baharu MM2H juga memberikan imej negatif kepada mereka yang telah menyertai MM2H dan terdapat rintihan peserta-peserta yang tidak ingin memperbaharui selepas tamat tempoh 10 tahun mereka. Tuan Yang di-Pertua, saya ingin meminta butiran berikut:

- (i) butiran jumlah peserta MM2H berserta keluarga mereka mengikut negeri-negeri di Malaysia yang mana mereka mendiami sekarang;
- (ii) peratusan peserta MM2H bersama keluarga mereka buat masa ini berbanding populasi warganegara Malaysia; dan
- (iii) apakah '*benchmark*' atau perbandingan telah dilakukan terhadap program yang setara di negara jiran kita seperti Thailand dan Indonesia yang turut mempunyai program seumpama ini dan sama ada syarat kita kompetitif berbanding dengan negara jiran kita.

Saya mencadangkan supaya semakan semula ini dan dilihat semula syarat-syaratnya supaya meramaikan lagi peserta MM2H. Ini tertakluk kepada ambang angka satu peratus populasi warganegara Malaysia dan bukan mengurangkan penyertaan peserta MM2H dengan pertimbangan terhadap kegawatan ekonomi di negara kita selepas pandemik COVID19. Program MM2H membawa manfaat kepada pelbagai industri khususnya di bandar-bandar utama seperti di Pulau Pinang dan Kuala Lumpur.

Saya memohon supaya Yang Berhormat Menteri Dalam Negeri dapat memberikan jawapan terhadap setiap satu persoalan yang dibangkitkan di atas. Sekian, terima kasih.

Tuan Yang di-Pertua: Terima kasih. Silakan Yang Berhormat Timbalan Menteri.

2.38 ptg.

Timbalan Menteri Dalam Negeri II [Tuan Jonathan bin Yasin]: Tuan Yang di-Pertua. Untuk makluman Yang Berhormat Bukit Bendera, Program Malaysia Rumah Keduaku (MM2H) yang pada awalnya dikenali sebagai Program Silver Hair, telah dijenamakan semula kepada Program MM2H pada tahun 2002.

Sepanjang 19 tahun pelaksanaan program ini, dasar dan syarat-syarat berkaitan Program MM2H tidak pernah dikaji semula atau dibuat penilaian secara berkala. Oleh yang demikian, syarat kelayakan sedia ada dilihat sudah tidak relevan dan realistik sebagai asas atau nilai pelaburan terbaik untuk menarik warga asing khususnya yang berkualiti dalam menjana pertumbuhan ekonomi negara.

Perubahan dasar Program Malaysia Rumah Keduaku (MM2H) tidak dilaksanakan secara drastik kerana penilaian awal telah dibuat sejak tahun 2019 lagi dan turut melibatkan beberapa kementerian, agensi atau agensi yang berkepentingan. Sepanjang program ini dibekukan, pelaksanaannya pada tahun 2020, susulan daripada keputusan kerajaan untuk melaksanakan dasar penutupan sempadan negara. Kementerian Dalam Negeri dan Kementerian Pelancongan, Seni dan Budaya telah meneliti semula dasar dan syarat-syarat program-program ini sebelum mengumumkan pengaktifan semula Program MM2H.

Terkini, kerajaan telah bersetuju dengan penambahbaikan dasar baharu Program MM2H sebagai salah satu strategi untuk membantu pelaksanaan program pemulihan negara bagi menjana semula ekonomi negara. Sehubungan dengan itu, seperti mana yang telah diumumkan dalam sidang media yang diadakan pada 11 Ogos yang lepas, Program MM2H akan diaktifkan semula dan permohonan baharu akan diproses serta akan dikendalikan oleh Jabatan Imigresen Malaysia mulai Oktober 2021 iaitu setelah semua proses berkaitan perundangan selesai.

■1440

Tuan Yang di-Pertua, bagi menjawab permohonan butiran oleh Ahli Yang Berhormat berkenaan jumlah peserta MM2H, memandangkan permohonan di Semenanjung adalah berpusat di Putrajaya, data mengenai jumlah peserta MM2H berserta keluarga mereka mengikut negeri-negeri Malaysia yang mana mereka mendiami sekarang tidak dapat dijana secara automatik oleh sistem MyIMMs,

Jabatan Imigresen Malaysia, memandangkan data hanya direkod mengikut pejabat pengeluaran pas tersebut sahaja iaitu di Putrajaya, Sabah dan Sarawak.

Bagi peserta Program MM2H yang telah diluluskan, mereka boleh tinggal di mana-mana negeri mengikut syarat yang dikeluarkan oleh pihak yang meluluskan. Contohnya, bagi peserta yang diluluskan di Putrajaya, hanya boleh tinggal di Semenanjung Malaysia sahaja. Sehingga 31 Ogos 2021, pemegang pas aktif dalam adalah seramai 56,612 orang termasuk tanggungan yang dibawa oleh pemegang pas MM2H. Warganegara China merupakan majoriti pemegang pas aktif dengan jumlah seramai 23,898 orang diikuti oleh warganegara Republik Korea iaitu seramai 5,223 orang dan warga Jepun iaitu 5,732. Peratus peserta MM2H bersama keluarga mereka buat masa ini berbanding dengan populasi warganegara Malaysia adalah sebanyak 0.17 peratus.

Merujuk kepada permohonan Ahli Yang Berhormat tentang *benchmarking* program seperti Program MM2H, dengan negara-negara jiran, untuk makluman Ahli Yang Berhormat, penanda aras dan perbandingan program seumpamanya telah dilaksanakan dengan negara Thailand, Filipina, Kemboja dan Indonesia semasa menyemak semula cadangan syarat penyertaan Program MM2H.

Saya rasa, penyertaan MM2H adalah lebih kompetitif berbanding dengan negara jiran kita. Contohnya, Malaysia tidak mengenakan apa-apa fi keahlian kepada peserta Program MM2H, tetapi negara Thailand mengenakan fi keahlian yang tidak boleh dituntut semula. Sehingga kini, kerajaan belum menerima pemakluman secara rasmi daripada peserta-peserta mengenai kesan pelaksanaan dasar baharu Program MM2H terhadap mereka.

Walau bagaimanapun, kerajaan sedar bagi tempoh jangka masa yang panjang, mungkin akan terdapat kesan atau impak ke atas bilangan penyertaan ke dalam program ini. Namun begitu, kerajaan berkeyakinan bahawa kesan atau impak tersebut adalah minimum kerana program ini adalah merupakan antara salah satu produk pelancongan yang terbaik di dunia yang mendapat permintaan tinggi.

Kerajaan juga turut mendengar pandangan-pandangan dan cadangan daripada pihak-pihak tertentu berkenaan kesan terhadap peserta sedia ada terutama, pesara, penerima pencen dan peserta MM2H sedia ada yang telah lama menetap di Malaysia dan telah menjual aset di negara asal. Malaysia bukan sahaja menjadi rumah kedua mereka, bahkan satu-satunya rumah yang mereka miliki. Oleh yang demikian, kerajaan memberikan jaminan untuk meneliti semula perkara ini dan memberikan pertimbangan sewajarnya setelah pelbagai aspek diambil kira. Pengumuman mengenainya akan dibuat di dalam masa yang terdekat.

Kementerian Dalam Negeri sentiasa cakna dan prihatin dengan keberadaan warga asing di Malaysia, termasuk juga peserta MM2H. Hasrat memenuhi kerajaan dalam menambah baik syarat-syarat penyertaan program MM2H adalah untuk memastikan setiap peserta program MM2H yang ingin bermastautin di negara ini adalah terdiri daripada mereka yang berkualiti dan dapat menyumbang kepada kemajuan ekonomi negara.

Kementerian Dalam Negeri juga sentiasa terbuka dengan maklum balas dari mana-mana pihak terutamanya yang mempunyai kepentingan di dalam Program MM2H dan bersedia untuk melakukan penyesuaian selaras dengan aspirasi program untuk meningkatkan penyertaan warga asing dalam program ini. Terima kasih, Tuan Yang di-Pertua.

Pusat Latihan Berasrama Bagi Archagar Tempatan

2.44 ptg.

Tuan Sivakumar Varatharaju Naidu [Batu Gajah]: Terima kasih saya ucapkan kepada Tuan Yang di-Pertua. Terima kasih juga saya ucapkan kepada Yang Berhormat Timbalan Menteri Sumber Manusia kerana sudi datang untuk menjawab ucapan saya berkaitan dengan Pusat Latihan Berasrama bagi Archagar tempatan.

Tuan Yang di-Pertua, pengendali upacara sembahyang dan istiadat ritual di kuil Hindu dikenali sebagai Archagar. Sebahagian besar dari kuil-kuil Hindu di negara kita menghadapi masalah untuk mendapatkan Archagar untuk mengendalikan upacara keagamaan.

Ini menyebabkan kuil-kuil ini terpaksa bergantung kepada Archagar dari negara India yang datang dengan permit kerja. Mereka berkhidmat untuk beberapa tahun dan kembali ke negara India. Selain daripada itu, mendapatkan kelulusan daripada pihak Jabatan Imigresen Malaysia juga bukanlah mudah untuk membawa masuk pekerja-pekerja ini. Lagipun, kerajaan berhasrat untuk mengurangkan tenaga kerja asing di negara kita.

Oleh yang demikian, saya mencadangkan supaya kerajaan membantu menubuhkan pusat-pusat latihan berasrama untuk melatih Archagar dari kalangan anak watan yang berminat dalam bidang ini. Kerajaan boleh membantu dari segi penyediaan premis, bayaran kos operasi dan gaji guru-guru serta kakitangan pentadbir pusat-pusat tersebut. Ini membolehkan kita melahirkan Archagar untuk memenuhi keperluan kuil-kuil tempatan di seluruh negara. Pada masa sekarang, kita terpaksa pergi ke negara India untuk mempelajari hal-hal ini.

Tuan Yang di-Pertua, ini amat membebankan kerana melibatkan kos yang agak tinggi. Dengan adanya pusat-pusat latihan dengan segala fasiliti, kita tidak lagi perlu bergantung kepada negara India untuk membekalkan tenaga kerja ini. Tambahan pula, ini akan membuka peluang kepada anak watan untuk memperoleh pekerjaan dan pendapatan yang berpatutan. Saya percaya ramai yang akan menunjukkan minat dalam bidang ini jika peluang seperti ini diwujudkan di negara kita oleh kerajaan sendiri.

Jika perlu, sukatan pelajaran dan sebahagian daripada guru-guru boleh dibawa dari India untuk sementara waktu. Setelah kita memiliki tenaga pakar dalam bidang ini, kita boleh mengurangkan tenaga pengajar daripada negara India. Saya memohon kepada Menteri Sumber Manusia untuk mengkaji cadangan ini dan mengambil tindakan sewajarnya. Ini akan membantu kuil-kuil Hindu di seluruh negara. Kerajaan harus mengadakan sesi perbincangan dengan pihak-pihak yang mempunyai kepentingan dalam hal ini untuk mendapatkan input yang bersangkutan.

Saya yakin pihak kuil, persatuan-persatuan keagamaan dan pertubuhan-pertubuhan bukan kerajaan berasaskan agama Hindu akan melangkah ke hadapan membantu kerajaan dalam hal ini. Saya mohon respons daripada Menteri Sumber Manusia. Sekian, terima kasih.

Tuan Yang di-Pertua: Terima kasih. Silakan, Yang Berhormat Timbalan Menteri.

2.48 ptg.

Timbalan Menteri Sumber Manusia [Datuk Haji Awang bin Hashim]: Terima kasih, Tuan Yang di-Pertua. Terima kasih juga Yang Berhormat Batu Gajah yang membangkitkan perkara yang harus kita teliti. Kebetulan, kalau mengikut teks asal daripada isu yang dibangkitkan, ini ditujukan kepada Kementerian Perpaduan Negara. Akan tetapi, disebabkan Menteri Sumber Manusia mewakili orang-orang India di Malaysia ini, satu-satunya Menteri yang ada di kerajaan, jadi dia *passing* isu yang dibangkitkan ini kepada Kementerian Sumber Manusia.

Jadi, apabila saya sebut 'saya', maknanya bukan saya. Saya mewakili Yang Berhormat Menteri. Jadi, Tuan Yang di-Pertua, petang ini yang penuh berkat ini, kami – Jadi kita sebagai kerajaan, sentiasa berusaha untuk memelihara kebebasan beragama di negara kita yang diperuntukkan dalam Perlembagaan Persekutuan. Ini di mana, kita sangat melihat kepada keharmonian dalam negara kita mengatasi segala-galanya. Jadi, kerajaan juga tidak menghalang rakyat di negara ini untuk melakukan aktiviti keagamaan masing-masing.

Ini yang kita cetuskan dalam keharmonian negara berdasarkan Perlembagaan Negara yang telah kita persetujui. Bagaimanapun, cadangan untuk menubuhkan pusat latihan berasrama bagi Archagar. Archagar ini untuk makluman semua – sepatutnya Yang Berhormat Batu Gajah kena terangkan, bukan semua faham apa itu Archagar tetapi saya faham iaitu seperti Tok Sami lah, paderi semua ini. Jadi, itu dia Archagar tetapi, khusus namanya untuk agama Hindu ini adalah 'Archagar'.

Jadi, mereka perlu mempunyai *leader*, iaitu prinsip *leader* yang boleh memandu penganut-penganutnya ke jalan yang lebih baik. Jadi, dalam keadaan ini, seperti mana yang dibangkitkan iaitu pusat latihan berasrama bagi Archagar tempatan seperti yang dicadangkan oleh Yang Berhormat Batu Gajah, kita perlu teliti dengan lebih mendalam kerana ia memerlukan penelitian yang serius dari semua parti-parti ataupun pihak-pihak yang terlibat. Ini termasuk juga – kita akan melihat dari segi kos pengurusan, peruntukan.

Jadi, saya melihat kerjaya sebagai Archagar ini di Malaysia, buat masa ini, kurang diminati oleh rakyat tempatan dan tidak ramai yang ingin memulakan kerjayanya sebagai Archagar. Ini kerana, kita lihat sambutan dan perhatian golongan muda menceburi bidang ini adalah kurang memandangkan tawaran gaji yang tidak menarik. Apabila gaji tidak menarik, mereka hendak buat pinjaman rumah, hendak beli kereta, pinjaman semua tidak ada satu dorongan dari bank-bank yang menyebabkan mereka boleh melibatkan diri dalam Archagar.

Jadi, yang tidak menarik ini menyebabkan mereka tidak ada rasa satu perlindungan sosial yang disediakan kepada mereka. Disebabkan oleh perkara ini, Archagar tempatan menghadapi kesukaran untuk mendapatkan pinjaman daripada institusi kewangan bagi membeli rumah atau kenderaan untuk meneruskan *life and livelihood*, ini penting. Kehidupan manusia. Dia hendak berkahwin, ada anak, anak hendak sekolah, apa semua ini, itu dipanggil *livelihood*.

Namun, apa yang kita boleh ketengahkan ialah melalui inisiatif yang dibuat oleh persatuan dan juga pertubuhan agama Hindu. Salah satu usaha yang kita boleh ambil contoh, yang telah dilaksanakan adalah melalui Lembaga Wakaf Hindu Pulau Pinang dengan kerjasama Malaysia Hindu Archagar Sangam yang berusaha melatih rakyat tempatan yang berminat untuk menceburi bidang ini. Ini di mana, mereka dengan usaha mereka sendiri telah berusaha menubuhkan Penang Hindu Academy, minta izin kepada Tuan Yang di-Pertua untuk – sebab suara saya boleh keluar dengan jelas sikit, saya tarik sekejap. Sekejap lagi saya akan angkat balik mask ini. Bila ini, dia *blocking*. Jadi, suara kita sebutan tidak berapa mahu jelas dalam keadaan kita bercakap pakai mask ini.

Jadi, dengan usaha mereka sendiri mereka menubuhkan Penang Hindu Academy yang menjalankan latihan jangka pendek seperti kursus pengenalan Archagar tahap satu yang dihadiri lebih kurang 60 orang peserta dari seluruh negara. Bagi tahun 2018 dan tahun 2019, Lembaga Wakaf Hindu Pulau Pinang dengan kerjasama Malaysia Hindu Dharma Mamandram (MHDM) – *is it right? My pronunciations? ‘Mamandram’*.

Tuan Sivakumar Varatharaju Naidu [Batu Gajah]: Betul, betul.

Datuk Haji Awang bin Hashim: ...telah melatih seramai 49 orang yang kini berkhidmat sebagai Archagar sepenuh masa dan separuh masa. *This is initiative. I mentioned just now. Afford from this*, minta maaf, dengan izin – Oleh itu, persatuan dan pertubuhan agama Hindu yang lain juga wajar mencontohi inisiatif yang dilaksanakan oleh Lembaga Wakaf Hindu Pulau Pinang bagi menarik minat lebih ramai penganut agama Hindu menceburi kerjaya sebagai Archagar, di samping menawarkan pendapatan yang lebih setimpal.

Di Malaysia, latihan kepada Archagar adalah dalam bentuk kursus-kursus jangka pendek. Oleh itu, penubuhan sebuah pusat latihan khusus bagi Archagar untuk menarik minat ramai tempatan buat masa ini adalah tidak perlu dan tidak praktikal. Bagi keperluan untuk melatih rakyat Malaysia yang berminat memulakan kerjaya sebagai Archagar, permohonan boleh dikemukakan kepada Malaysian Indian Transformation Unit (MITRA).

Maknanya, kerajaan menyokong ini. Dia ada satu badan yang disebut sebagai MITRA, di bawah Kementerian Perpaduan Negara yang boleh membantu. Maknanya perlu kepada *unity from all the* kuil.

Di samping itu, bagi mengatasi masalah kekurangan Archagar pada masa ini, kerajaan boleh mempertimbangkan. Ini saya ulang, kerajaan boleh mempertimbangkan untuk membuka kemasukan Archagar daripada negara India ke Malaysia tertakluk kepada keadaan pandemik COVID-19 kelak. Sekian, terima kasih Tuan Yang di-Pertua kerana memberikan peluang kepada saya untuk menjelaskan isu yang dibangkitkan. Okey, terima kasih.

Tuan Yang di-Pertua: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, Isnin, 20 September 2021. Terima kasih Ahli-ahli Yang Berhormat. *Assalamualaikum*.

[Kamar Khas ditangguhkan pada pukul 2.46 petang]